

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

23 Mars 2018
(04 Rajab 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « La Vie et Mission du Messie Promis (as) ».



Azordi le 23 Mars 2018, kot sa faire 129 ans dépi ki Massih Ma'ud, Hazrat Mirza Ghulam Ahmad (as) de Qadian, ti fonde le Mouvement Ahmadiyya et ti accepter bane serments d'allégeance (*Bai'at*) de la part de 40 de so bane disciples dans la caze de Sufi Ahmad Jan dans Ludhiana. Premier dimoune ki fine prend Bai'at dans la main de Hazrat Massih Ma'ud (as) c'est Hazrat Maulvi Nuruddin (ra) de Bhera ki fine par la suite vine le premier calife du Messie Promis (as) - *Khalifatul-Massih Awwal*.

Dans Maurice et bane les autres pays dans le monde, sa jour historique là li connu comme: **Massih Ma'ud Day** et nous, bane Ahmadis, nous saizi sa l'occasion là pou cause lor la vie et bane aspé de mission de Hazrat Massih Ma'ud (as).

Hazrat Mirza Ghulam Ahmad (as) ti appartenir à ene clan Persan ki appelle Burlass. Parmi so bane ancêtre ti ena Mirza Hadi Baig, ki ti émigré depuis so la ville natale Samarkand (Khurasan) pou vine dans l'Inde accompagné de deux cents dimounes de parmi so clan ki ti inclure so bane familles et so bane employés. Li ti ene dimoune bien noble, ene savant et ene dimoune pieux. L'Inde ti à sa l'époque là sous le règne de l'empéreur Moghol Babar, et l'empéreur là ti remette bane grand boutte terrains avec Mirza Hadi Baig en cadeau pour so bane services loyale.

Alors Mirza Hadi Baig fine choisir ene boutte de sa vaste étendu de bane terrains là, et li fine décide pou établi li là-bas ensam avec so clan. Li fine alors fonde ene la ville ki li fine appelle Islampur et avec le passage du temps, le nom Islampur fine passe sous plusieurs formes de bane changements et li fine connu couma Islampur Qadi Maajhi, et ensuite simplement Qadi Maajhi, et ensuite Qadi, et kot finalement li fine connu comme Qadian.

Hazrat Massih Ma'ud (as) so arrière grand-père (de côté so papa) ti appelle Mirza Gul Muhammad ki ti ene dimoune pieux et ki ti rempli de *Taqwa* (la crainte d'Allah), et li ti aussi connu comme ene dimoune honnête. Dada de Hazrat Massih Ma'ud (as) ti appelle Mirza 'Ata Muhammad, ki ti garçon de Mirza Gul Muhammad. Et Hazrat Massih Ma'ud (as) so papa ti appelle Mirza Ghulam Murtaza et so mama ti appelle Chiragh Bibi. So mama ti connu pour so hospitalité et so grand soin ki li ti pé donne bane pauvres.

Le Messie Promis (as) d'après bane calcules ti né ene Vendredi 13 Février 1835 (14 Shawwal 1250 Hijri), avant le lever du soleil. Li ti né avec ene sœur jumelle (ki pas fine survive). So naissance avec ene jumeau ti ricorde dans la littérature islamique concernant le fait ki le Mahdi Promis pou né avec ene jumeau. (Fusus al-Hikam par Muhyiuddin Ibn Arabi).

Depuis so l'enfance, Hazrat Massih Ma'ud (as) pas ti content perdi so létemps dans bane zaffaires inutiles et li ti pé reste loin avec bane ti méchancetés ki so bane camarades ti pé faire à zot l'âge. Pour so l'éducation, so bane parents fine faire trois différent tuteurs, ene après l'autre vini pour éduque li dans plusieurs matières.

Très jeune même, Hazrat Massih Ma'ud (as) fine marier. So premier mariage ti ena lieu kan li ti ena 15 ans. Sa ti ene mariage arrangé avec so cousine, de côté famille so mama, ki ti appelle Hurmat Bibi (Hurmat Bibi ti tifille de so Mamou Mirza Jamaat Baig). Deux garçons fine né de sa mariage là. Ene c'est Mirza Sultan Ahmad et l'autre c'est, Mirza Fazal Ahmad. Tandis ki Mirza Fazal Ahmad et Mirza Sultan pas fine croire dans zot papa comme le *Mujaddid* et le Messie Promis de so l'époque durant so vivant, mais c'est seulement Mirza Sultan Ahmad ki, après la mort de so papa fine gagne la foi, et fine prend le *Bai'at* et fine intégrer le Jamaat Ahmadiyya dans la main de so demi-frère, Hazrat Mirza Bashiruddin Mahmud Ahmad (ra), le deuxième Calife du Mouvement Ahmadiyya.

Depuis bien jeune, Hazrat Mirza Ghulam Ahmad (as) ti content so privacy et ki pé passe la plupart de so létemps dans duahs et Namaz ou sois li ti pé plonge li dans l'étude du Quran Shareef. So papa ti bien conscient de grand préoccupation de so garçon avec la religion mais malgré sa, comme ene papa, li ti gagne beaucoup tracas pou li, couma eski li pou capave zoine deux boutes après so la mort. Tanque ki li ti vivant, li pé occupe li de so garçon, mais ki pou arriver après so la mort?

Mirza Ghulam Murtaza ti habitué fer sa remarque là à propos Hazrat Mirza Ghulam Ahmad (as) à so bane camarades, kot li dire: « *Mo garçon là li ene "Maseetar" (c'est-à-dire, en Punjabi, sa veut dire, ene kikaine ki passe la plupart de so létemps dans Masjid, dans fer Namaz). Li pas rode alle travail kitpar et ni li intéresser dans rode ene travail (pou soutenir li-même financièrement)...* ».

Ki kalité grand l'honneur sa ti pou été pou li si li ti vivre assez longtemps pou trouver couma Allah fine choisir so garçon par la suite et fine fer li vine le Messie et Mahdi Promis de so l'époque!

Hazrat Massih Ma'ud (as) so papa fine décédé en Juin 1876 après le coucher du soleil. Sa jour là même à midi, li fine recevoir ene révélation kot là-dans Allah fine informe li la mort imminent de so papa. Dans sa condition de chagrin là, li fine brièvement laisse li-même affecter par ene sentiment d'insécurité concernant so *Rozi* (condition financière) parski c'est so papa ki ti habitué occupe li et donne li tout saki li ti pé bizin concernant l'argent et manger et boire, et alors li fine alle penser ki tout bane ressources financière ki associer avec so papa pou arrive à ene fin et ki alors bane jours de pauvreté et de la peine pé attane li pli devant.

Immédiatement, li fine recevoir ene révélation de côté Allah: **Alaysallaahu bi-kaafin abdahu** (*Eski Allah pas suffit pou so serviteur?*).

Sa révélation là fine donne li ene réconfort extraordinaire et fine soulage li de so bane inquiétudes et donne li ene tranquillité d'esprit, parski li maintenant claire ki c'est Allah ki pou occupe li et pou débarrasse li de tous so bane problèmes.

En l'an 1882, li fine trouve Nabi Kareem Hazrat Muhammad (saws) dans ene vision et c'est là ki li fine recevoir premier révélation de côté d'Allah concernant le fait ki Allah fine élève li comme *Mujaddid* (Réformateur). Par la suite en 1889, Hazrat Mirza Ghulam Ahmad (as) ti fonde le Mouvement Ahmadiyya pou faire revivre la foi dans Allah, et pou challenge tous bane arguments ki contre l'Islam et ki contre tous bane l'enseignements de l'Islam. Li ti ene protecteur du Quran et de bane musulmans mais malheureusement la majorité de bane musulmans pas fine conne so valeur et fine traite li de toutes sortes kalités noms.

Li fine décéder dans Lahore le 26 Mai 1908 et li fine quitte derrière li ene Jamaat en tristesse ki fine lutter pendant longtemps pou propage so bane l'enseignements dans la meilleure façon. Mais malheureusement avec le temps, petit à petit bane dimounes de sa Jamaat là fine éloigner avec so bane l'enseignements et Allah et bane ki à la tête fine prend zot position comme l'argent comptant et fine bafoué so bane l'enseignements, et Allah, de par So grâce immense fine élève ene lotte *Mujaddid*, et Messie dans sa siècle présent là pou apporte ene réforme dans le monde en entier et pou défanne l'honneur de l'Islam et de Hazrat Muhammad (saws) et de Hazrat Mirza Ghulam Ahmad (as), bane serviteurs par excellence d'Allah. *Alhamdulillah.*

Ki Allah aide nous tous pou toujours reste sous bannière de l'Islam et pou toujours sauvegarde l'honneur de bane messagers d'Allah, et de bane réformateurs de la religion d'Allah. Ki Allah aide le Jamaat Ul Sahih Al Islam pou accomplir sa grand travail là, en ayant toujours bane ki ena la crainte d'Allah et bane pieux dans so cercle. *Insha-Allah, Ameen.*

